



BIBLIOTHECA
UNIV. JAGELL.
CRACOVENSIS

Nat. komp.

17399

Mag. St. Dr.



Biblioteka Jagiellońska



stdr0002971

PANEG.
Polon
M



17399

I Mag. St. Dr.

P

Leheni Andreasi Panegyricus ad p. et h.
D. d. Bernardum Maniewiczki et

PANEG. et VITAE
Polon.
№ 573.

P

D

PANEGYRICVS

AD ILLVSTRISS^m ET R^eDISS^m DOMINVM,
D. BERNARDVM MACIEIOWSKI,
S.R.E. CARDINALEM, EPISCOPVM CRA-
couiensem, Ducem Seuerien: &c.
Mœcenatem amplissimum.

ANDRÆ SCHONEI,
S. Theologiæ In Academia Craccuiensi
Professoris.



CRACOVIAE
In Officina Lazari. Anno Domini,
1604.

KK. III. 74. y. 6



G. R. BIBLIOTHECA
VNIV. CRACOVIENSIS
IAGEL

17399I

Mag. Str.

P. Vrpureum tribuit tibi Summus Præsul honorem,
Fecit & excelsis Regibus esse parem.
Non tamen hic sublimis apex, mage te ornat, vt ipsum
Tu contra illustras dotibus eximiis.
Exuperat titulos, pietas, prudentia, virtus,
Digna nec in terris præmia repperient.

A. S.

PANEGYRICVS

ANDREAE SCHONEI.

ILLVSTRISS° AC R°DISS°
D. BERNARDO MACIEIOWSKI,

S. R. E. CARDINALI, EPI: CRAC: D. D.



N summa omnium lætitia, interq; tot
gratulantium faustas atq; iucundas vo-
ces, & ego, Cardinalis Amplissime, ex
mediis Academiae spatiis accurro; vt
amplissimum hunc, & primo prox-
imum honorem, coram voce, vultu,
oculis tibi gratuler, gloriosæq; purpuræ tuæ, vel
imam laciniam attingere & deosculari mihi liceat.
Si enim & ij, qui in extremis Italiae atq; Hispaniae
oris vitam agunt, & ad quos sola nominis tui fama
peruenit, optatissimo hoc nuncio accepto, effusis
certatim studiis, dignitati tuæ applauserunt, graui-
ssimumq; Pontificis maximi iudicium, maxima ani-
morū consensione atq; alacritate cōprobarunt: quæ
mea mens, qui sensus, qui iucundus animi motus
esse debuit, cui præstantissimas tuas virtutes propi-
ùs intueri, exploratiùs cognoscere, & impensius ve-
nerari cōcessum fuit. Et cum beneficiorū, quæ me-
rentibus tribuuntur, gaudium, non magis ad ipsos,

quàm ad omnes bonos, verosq; rerum æstimatores
perueniat, tum in eos potissimum redundet, qui
humanitatis & beneuolentiæ officiis sunt obligati;
quî ego aut gestientis animi lætitiâ cohibere po-
tui, aut exultantem pectoris affectum palàm osten-
dere non debui. Nam tu, vt vidisti me, amasti, ac
continenter tot annos eximia humanitate comple-
xum, nuper etiam Gymnicorum ludorum præfectû,
quem nostri Vicecancellarium dicunt, tuo loco &
nomine, in Lycæo Cracouiensi me constituendum
duxisti. Quod arduum atq; grauissimum munus,
& si aliis mei ordinis hominibus, qui ingenio, autho-
ritate, naturæ fortunæq; bonis me antecellunt; re-
ctius fortè committi potuisset, mihi nihilominus
abstinenti, & omnis ambitionis incurioso delatum
esse, non potuit non accidere gratissimum, eaq; re
singularis tuus in me amor, omni ex parte luculen-
tissimè sese ostendit. Sed facessant priuata volunta-
tum studia, valeant mutua inter patronum & clien-
tem officia, nec domestica voluptas aliquid de cō-
munis lætitiæ suauitate decerpat, proinde mei quasi
oblitus, in pulcherrimarum rerum, quæ te summis
quibusq; honoribus iam olim dignissimū reddide-
runt, parca & verecunda commemoratione, omnē
orationem consumam. Iuuat ergò per laudum tua-
rum spatia atq; vestigia, tanquam per viridicata pra-
ta fron-

ta, frondosa nemora, vernantesq; hortos, læto passu
incedere; ac summa omnis gloriæ atq; dignitatis ca-
pita perstringendo, ad decus, ad honestatem, tua-
rumq; virtutum imitationem animos accendere &
excitare. Sed quemadmodum, qui pura nocte cæ-
lum magnitudine immensum, ordinata varietate
constantissimum, ornatu atq; siderum luminibus
pulcherrimum contemplantur, dum hanc stellam
nitentem admirantur, aliam mox nitidiorem suspi-
ciunt; & in hanc dum aciem oculorum defigunt,
aliæ atq; alię lucidiores hinc inde, oculis eorū obo-
riuntur: ita dum pulcherrima tua animi, naturæ,
aliæq; decora atq; ornamenta intueor, suspensio ani-
mo, ancipitiq; iudicio, hæc illis, illa his excellere vi-
dentur, vniuscq; claritas alterius splendore obruitur
& obfuscatur. Illustris est generis tui amplitudo at-
que dignitas: at longè illustrior exacta prudentia,
maturo iudicio, maximoq; rerum usu atq; tractatio-
ne comitata. sed cum his certant vicissim, singularis
animi moderatio, naturæ facilitas, munificentia,
quæ omnia a Religione, pietate, vitæ integritate,
morumq; grauitate vincuntur, exornantur, perfici-
untur. Rarus est, qui omnium virtutum choro co-
mitatus est, cuius egregiæ animi dotes non aliquo
vitiis confinio læderentur. Enitescit aliquis in
bello, sed in pace obsolescit, alium toga, sed non &

arma cohonestarunt; multos claros foris, domestica deturpauit infamia. Ita vbiq; mala sunt vicina bonis, in iisq; etiam, qui in optimis numerantur, multa artificio declinanda sunt, quæ offendant. Tu verò, macte ea laude, omnes dignitatis atq; gloriæ partes atq; numeros complexus es; ita omnibus, animi, naturæ, fortunæq; bonis abundè ornatus es; vt ad eorum cumulū vix aliqua possit fieri accessio: & quid iure merito reprehendi possit, ne inuidus quidem atq; curiosus centum oculis Argi peruideret. Nihilq; tibi ad laudem amplius, ad nominis immortalitatem illustrius, quàm te penitus perspicere, tuæq; quæ limine tenes, intraq; intimos recludis recessu, in publicum proferri, ab omnibusq; cognosci.

Atq; non multū in vetustissimæ tuæ gentis nobilitate commemoranda mea exultabit oratio, non assentatoriè Vitelliorum & Macieiouiorum egregia facta consecrabor; cū & hæc fidelissimis annalium monumentis sint prodita, & tu propriæ quàm alienæ famæ incumbere semper maluisti. Namq; alii ex maioribus tuis, laudis patriæq; amore incensi, vitæ lucisq; prodigi, fortia bella gesserunt, ordines duxere, signis conflixere, pugnas restituere, hostium impetus retulerunt, copias profligarunt, acies perruperunt, à Ciuiumq; iugulis acinaces, mucrones, à pectoribus tela atq; sagittas, à capitibus ferui-

feruitutem atq; ignominiam depulerunt : alii togæ
artibus clari , authoritate & prudentia Reipublicæ
dignitatem auxerunt , constantia & pietate Religi-
onem Ecclesiæq; libertatem defēderunt. Quis Ro-
berto vitæ innocentia , morum grauitate , dicendi
facultate præstantior fuit ? qui tempore Mieislai ,
primi apud Polonos Christianorum sacris initiati
Principis , Archiepiscopum Gnesnensem egit , her-
bescentemq; Fidei segetem , ac prima Religionis in-
cunabula , mira sedulitate fouit , nutriuit , propaga-
uit. Non commemoro alios duos è vestra oriundos
stirpe , Archiepiscopos , quorum in principem illam
Ecclesiam , liberalitatis atq; pietatis monumēta ex-
tant plurima. Mitto Andream Episcopum Plocen-
sem , Stanislaum Posnaniensem Antistitem ; quorum
ille omni genere doctrinæ liberalis excultus , inq;
Ecclesiæ iniuriis vindicādis inuidto animo fuit ; hic
in prouidēdo sagax , in tractandis negociis industri-
us , omnium Vladislai Iagellonis consiliorum par-
ticeps atq; moderator , supremus Cancellarius au-
diit. Quis Samuelem Macieiouium , Episcopum
Cracouiensem , ingenio , authoritate , Regum gra-
tia , studiis hominum , effusaq; liberalitate supera-
uit ? quis Nicolao Palatino Lublinensi , Stanisla-
o Castellano Sandomiriensi , pietate in Deum , chari-
tate in patriam , ergaq; omnes propensa voluntate ,
par

par & æqualis fuit. Hac inclyta stirpe prognatus, tot auos, atauosq; illustres longa serie numerans, nunquã sublimes titulos, fumosasq; imagines, inuidiosasq; opes iactantiùs ostētaſti: nō in iis omne decus præſidiumq; collocaſti; ſed iis quaſi quibuſdam calcaribus ad domesticarum virtutum imitationē te excitando, quod alii ex alienis ſibi arrogāt meritis, id tu ex propriis factis tibi concedi voluiſti, nihilq; pulcrum & iucundum arbitratus es, in quo comparando, non diu multumq; ſudaſſes. Nobilitas germana ſtirpe virtutis nititur: ac tam diu manet ac floret, donec in ea ſuccus honeſtatis viguerit; quo aſcente, & ipſa marceſcit. Vt enim ager, quò feracior atq; pinguior eſt, eò horridior, atq; deterior efficitur, ſi cultura non adhibeatur; ita quò nobilior parentum ſanguis, & quò magis generoſa ingenia, ſi non diſciplina infrænentur, & optimarum artium ſtudiis excolantur, procliuiùs & maiori impetu in omne genus ſclerum & flagitiorum ruunt atq; prolabuntur. Quamobrem, vtpriùs lubricam & incertā adoleſcentiæ viam ingreſſus es, durum pariter, ac rigidum virtutis iter triuiſti, in patientia animi & corporis te exercuiſti, eaq; literarum præſidia tibi comparaſti, quibus & conſilio te regere, & ſtatum mentis tueri, omnemq; cupiditatis immoderationem coercere poſſes. Et cū acri & acuto ingenio
eſſes

esses præditus, quod se sine doctrina etiam tueri posset; eam tamen in cognitione veritatis, disciplinarumq; perceptione diligentiam adhibuisti, quæ etiam tardissimam naturâ excitare posset; ita omnia celeriter arripuisti, mente comprehendisti, memoria sepsisti, ac si cuncta reminiscencia quadam recognosceres, nihilq; haberes discendum tempore docendi. Et quia hominem non modò ad intelligendum, sed & ad agendum natum scires, tibiq; aliquando in maiorum tuorum vestigiis standum, inq; Reipublicæ luce versandum præsentires; ita orbem omnium artium foeliciter confecisti; vt ex singulis tantum sumeres, quantum ad egregiæ virtutis vsum, publicamq; vtilitatē satis superq; esset. Quid enim est aliud scientiâ sciēdi tātum quærere, quam nummis ad numerandum duntaxat abundare? & quid aliud est, omnes disciplinarum minutias atq; subtilitates curiosè confectari, quàm cancris vesci, in quorum crustis vellicandis, paruo operæpretio, plurimùm occupari solemus? Tu scientiarum modum vtilitate terminasti, easq; tum ad aciem mentis illustrandam, tum ad vitæ consuetudinem accommodasti & retulisti; vt non modò de rebus rectè & prudenter iudicares, sed & quæ benè statuisses, feliciter exequerere. Et quia sapientiæ atq; virtutis subsidium & diuortium nullo modo ferendum est,

B

nullaq;

nullaq; funestior rebus communibus pestis adferri potest, quàm scelere & malitia armata literatura; tu, à teneris, vt aiunt, vnguiculis, vtrumq; pulcherrimo societatis vinculo coniunxisti, atq; in vtroq; excellere, gloriosum duxisti. Nihil leue & ludicrum ob grauitatem, nihil molle & flagitiosum ob industriam, nihil tumidum & inflatum ob modestiam expetiisti: nihil timidè & diffidenter, nihil præposterè & negligenter, nihil temerè & impotenter egisti; sed in omnibus dictis & factis, modum & ordinem, decorum atq; constantiam tenuisti. Omnia blandimenta & lenocinia naturæ auersatus es, omnem luxuriam & intemperantiam fugisti, omnem impuritatem atq; turpitudinem exhorruisti; teq; à sensuum consuetudine auocans, & à corpore ad animum reuocans, summam voluptatem in immanium voluptatum fuga, atq; modestiæ & pudoris concinnitate constituisti. Quid loquar de pietate, quæ vt est omnium virtutum fons & origo, canon & regula, à qua illa vitam & spiritum accipiunt, ita eam assidua cura, diligentia, studio coluisti, in ea te exercuisti, vt ab eius præscripto ne latum quidem vnguem discederes. Summa religione cæleste numen venerabare, ardentissima fide eius præsidium implorabas, tota mente mentem & voluntatem eius consulebas, incredibiliq; voluptate, in suauissimo illius collo-

colloquio atq; familiaritate conquiescebas. Nemo sapiens, qui Deum non colit: sapientia vera, tum in Dei pura & liquida cognitione, tum in sanctissimo eius cultu continetur. Vt enim Deus est architectus & molitor omnium rerum; ita lumen, ratio, veritas, qua omnia cognoscuntur. ille est, qui densas errorum tenebras dissipat, cælestibus instruit disciplinis, mentemq; veræ sapientiæ radiis illustrat. Quæ pietas tecum ab adolescentia creuit, adoleuit, maturuit, teq; vbiq; comitata est, tuarumq; omnium actionum dux, magistra, & moderatrix fuit, siue in aula Regum ageres, siue castra militiamq; sequerere, siue aliud negotium publicum, priuatum ageres. Qua virtute tanquam firmissimo Clypeo munitus, nunquam ad hostis vultum expalluisti, nunquam trepidasti, animo concidisti nunquam, pedem retulisti nunquam, sed victricia Poloniæ signa inconcussa manu tenuisti, & in hostem fortiter intulisti. Et quoniam vera pietas nunquã cessat, nunquam ocia-
tur, sed nunc contemplationis quasi quibusdam alis in altum subuecta, Deum quoad fas est, intuetur, adorat, prædicat: nunc charitatis officia exercet, solatur afflictos, fert opem miseris, docet ignaros, dirigit errantes, corrigit delinquentes: nunc contra hostes Ecclesiæ certamen init, dimicationem suscipit, ac doctrinam cælitus traditam animosè tuetur atq;

propagat: omnia hæc munera tu diligentissimè ex-
ecutus es: neq; solùm mentis agitatione, orisq;
præconio, sed & eximiis factis & rebus, animi tui
erga Deum, sanctissimamq; religionem, studium, &
deuotionem declarasti. Nam patrimonium à maio-
ribus tibi relictum, opima prædia & oppida, optimo
consilio, diuina vi excitatus, patribus Societatis Ie-
su, perpetuo iure addixisti, inscripsisti, donasti; vt
in illo Russiæ & Lithuanix confinio, contra Hære-
ticorum & Schismaticorum castra atq; acies, quasi
quædam cohortes prætorianæ excubarèt. Quorum
conatus, mirè fecunda gratia Deus adiuuat, auget,
fortunat, eorumq; opera multos à vitiis ad honesta-
tem, à tenebris ad lucem, ab errore in viã reductos
videmus & gaudemus. Quicquid ergò illi de Ec-
clesia Dei, de genere mortalium, bene merentur; id
tibi magna ex parte acceptum ferunt, teq; in par-
tem ac communionem meritorum libentissimè ac-
cipiunt. Maçti viri Apostolici, cœptum opus gna-
uiter vrgete, nec inuidiæ, nec calumniis, neq; labo-
ribus atq; periculis cedite; sed contra audentiores
itote: ille, qui vos sub tropheis filii sui vnigeniti cõ-
gregauit, vobis semper aderit, cælesti virtute corro-
borabit, ac in summa rerum confusione atq; pertur-
batione tuebitur. Rarum est sua dimittere, cùm
multi vt aliena consequantur, quid non faciãt? du-
rum est.

rum est auitis sese possessionibus exuere, cum personæ dignitas etiam plura requirat; sed longè grauius est & admirabilius, se relinquere, ac quodammodo seipsum seipso exuere. Nam ætate integra, quæ valida viribus, exercita laboribus, matura rebus gerendis, nullum non negocium conficere, nullum non munus sustinere posset, cum gratia Regum floreret, cum Regni Præfecturas teneres, cum tot emerita tam militiæ, quàm palatii stipendia haberes, diuina virtute confirmatus, pro fluxis & caducis, æterna atq; cælestia expetiisti, ac lubens volensq; ad vexillum Christi euolasti. Et vt maiora haberes piè & sanctè viuendi incitamenta, Romam, quæ te & viuís & mutis exemplis ad sanctimoniam accendere posset, longinquo & aspero itinere profectus es. Quò cum venisses, non Romam illam veterem, omnium superstitionum sentinam, atq; impiorum numinum Regiam, in suo cadauere atq; sepulchro iacentem quæsiuisti: non cælo certantia opera, amphiteatra, thermas, palatia, pyramidas, arcus triumphales, colossos, statuas, aërio pendentes fornice riuos, aliasq; infanas substructiones admiratus; sed in nouam Romam, arcem Religionis nostræ, sacrarium omnis sanctitatis, totq; Martyrum sanguine ac gloriosis trophæis illustratam oculos, omnemq; animum cōuertisti. Sæpè septem illas religiosissimas

basilias, sine vehiculo, summis caloribus frequentasti: sæpè ad limina Apostolorum procubuisti, postes deosculatus: sæpè præsepi domini affusus, bis genitum Regem adorasti: toties Lauacrum Constantini adiisti, ac sacrosanctam illam, dæmonumq; expultricem, imaginem Redemptoris nostri veneratus es: toties profundas illas, ac religionis pio horrore plenas criptas atq; catacumbas, tot Pontificum atq; Martyrum quondam latibula, ac veneranda sepulcra, subiisti, atq; lachrymarum largo imbri perfudisti: præterea tota vrbe monumēta atq; reliquias sanctorum perquirendo, sacris cineribus, fauillis, ossibus, osculum figebas, oculisq; oriq; admouebas: tu deniq; modestiam & grauitatem Romanam, seueram Cænobiorū disciplinam, amplissimas Xenodochiorum opes, atq; incredibilia omnis charitatis officia admirabare. Tandem satis probatus, atq; spectatus, per omnes Ecclesiastici ministerij gradus, ritè & sanctè progressus, venerabili sacerdotio ibidem initiatus atq; inauguratus es. Mirabile & iucundum erat videre, Macieiouium, qui in cohorte Regis primicerius fuerat, abiecto militari baltheo, militiæ Christi nomina dedisse, in ordine sacerdotum ministrare, vnum ex Canonicis Cracouiensibus esse, religiosè rem diuinam facere, precatonum pensum Deo fideliter reddere, cum Socolo-

uio,

uio, Rescio, Scarga, Dobrociescio, & aliis piis viris
 assiduè conuersari, in æde Mariæ Magdalenæ sacris
 exhortationibus & declamationibus interesse, obire
 monasteria, lustrare hospitalia, deniq; vultu, ge-
 stu, incessu, sanctimoniam præferre. Sed non diu
 hic gradus & locus tantum ingenium continere va-
 luit, nequiu it his angustiis tam excelsa cōarctari
 virtus: maiorem campum, in quo excurreret, ampli-
 us theatrum, in quo spectaretur, requirebat. Itaq;
 simulatq; post procellas atq; tempestates Interre-
 gni periculosissimi, Sigismundus Rex, superatis O-
 ceani fluctibus in Poloniam appulit, atq; ab amplif-
 simo viro Stanislao Karncouio Archiepiscopo Gne-
 snensi sacro oleo delibutus, Regioq; diademate
 insignitus, habenas Sarmatiæ moderari cœpit, incre-
 dibili tuarū virtutum amore & admiratione captus,
 te primo quoq; tempore, in principe aliquo digni-
 tatis gradu collocare statuit. Et cū interea Episco-
 pus Luceoriēsis è viuis excesserat, te ei successorem
 subitò & magna animi lætitia designauit: eāq; Sere-
 nissimi Regis voluntatem Sixtus V. altissimæ men-
 tis Pontifex, ratam habuit, ac libentissimè compro-
 bauit. Et quoniam hic apud nos, laudatissimo &
 sanctissimo maiorum instituto, Episcopi, non mo-
 dō Religionis, sacrorum atq; ceræmoniarum præsi-
 des sunt; sed & publici consilij moderatores, pri-
 mumq;

mumq; in Senatu locum teneant; tu subito omnes veri & perfecti Episcopi, atq; Senatoris partes, cura & cogitatione complexus, vna manu Ecclesiam, altera Rempublicam tractare cepisti; ac sedulo providere, ne quid Religio & communis utilitas detrimenti patiatur; sed omnia salua, tuta, atq; sarta-tecta conseruetur. Cumq; præclaris tuis actionibus eam de te animis omnium opinionem inseruisses, nihil esse tam arduum & difficile, quod tibi non sit leue & expeditum, nullamq; rem tam grauem atq; dubiam, quam non ingenio sustinere consilio tueri, virtute conficere posses; subinde alia super alia negocia tibi commissa, ac Regis & Reipublicæ nomine sumtuosas atq; laboriosas legationes suscipere coactus es. Ac primum ad altissimi sanguinis Principem consolandi gratia missus es, cuius & si æquum & infractum in omni euentu & fortuna animû, nulla vis aut calamitas labefactare ac percellere posset; tua tamen oratione mirificè recreatus, omnia moderatius ferre cœpit. Deinde more maiorum, atq; adeò omnium gentium, quæ Religione Christiana censentur, aliquis è proceribus Regni, consilio prouidens, virtute integer, authoritate venerabilis, religionē sanctus, ad Sedem Apostolicam, cæli vicariam, mittendus fuerat, qui nomine noui Regis, qui cum lacte materno, in gremio matris sagelloniæ Religionem

nem Catholicam hauserat, eamq; inter medias procellas hæresum, illibatam atq; integram, semper custodisset, obedientiam præstaret atq; profiteretur; tu tanquam solus fores, ad eam rem cum dignitate conficiendâ maximè aptus & idoneus, omnibus visus es. Quam grauissimam legationem ita gessisti, vt festinam celeritatem in itinere conficiendo adhibueris, splendido comitatu, ingentiq; hominum exterorum tibi obviam effusa multitudine urbem ingressus sis, summi & clarissimi quiq; viri te assiduè conuenerint, domum deduxerint, reduxerint, summa fide & prudentia mandata Regis exposueris; incredibili dicendi copia atq; grauitate augustissimum illum Senatum tenueris, deniq; spectata probitate & integritate, Sixti quinti: at quis, & quantus Pontifex? & in te propensum animum conuerteris, & egregiam animi voluntatem erga Regem vniuersamq; Poloniam excitaris, atq; inflammaris. Sed breui post tempore, Sixto quinto vita functo, iterû gratulationis atq; obedientiæ legatione ad Gregorium decimum quartum, functus es, eandemq; prudentiæ, industriæ atq; integritatis laudem retulisti, ingensq; tui desiderium discedēs reliquisti: & si, quæ tua est animi moderatio, in priuatam laudem atq; gloriâ deriuatû velles nihil; sed omnia ad honorem & splendorem charissimæ patriæ tuæ referres atq;

conuerteres. Te reducem Respublica complexa, pro re bene gesta immortales gratias egit, certisq; præiudiciis ac præfagiis tibi summa quæq; augurata, atq; sponndit. Tu verò vix puluerem ex itinere collectum excusseras, ac spiritum recollegeras, subito magna festinatione atq; celeritate, ad tuam Episcopam Luceorensem contendisti: atq; in custodia & statione constitutus, boni pastoris perfectam formam atq; imaginem vita & moribus, studijs & officijs expressisti, repræsentasti. Tu oues cælesti precio redemptas cōtra siluestres feras, quæ ad causas gregis sacri assidue fremunt, aditumq; rimantur vndiq;, sana doctrina obarmasti: tu eas in pratis saluberrimis, & omnium virtutum floribus vernantibus pauiisti, ac ne mala vicini pecoris contagia lædant, prouidisti: tu palantes requirebas, dilapsas colligebas, lapsas erigebas, ægras fouebas, debiles fulciebas, torpentes excitabas, exanimatas recreabas. Tu summa grauitate atq; lætitia Episcopos toties inaugurabas, Presbyteros consecrabas, novos Tyrones baltheo militiæ sacre astringebas, & in vineam Domini vndiq; novos operarios cōgregabas. Tu templa collapsa in integrum restituiisti, neglecta & squalore obsita in nitorem dedisti: nuda & egena & omnis generis suppellectilli, & nouis censibus & pensionibus, ornasti, auxisti, locupletasti. Quid autem ad

tem ad posteritatis memoriam prædicabilius, & ad gratiam Dei consequendam efficacius; quòd, cùm tua Dioecesis plena esset schismaticis, qui se à corpore Ecclesiæ Romanæ absciderunt, ac nescio quos novos Petros in Græcia & Tracia nequicquã quærunt, ex vrbe Roma, viros eruditos, & linguæ Græcæ peritissimos acciueris, qui cum pertinaci illa gente ex æquo pedem conferant, paribus armis congrediantur, ad dulcissimumq; matris sinum atq; gremium reducant. Quòd quàm feliciter cesserit, vel illud argumento esse potest, quòd Antistites sacrorum Russiæ, breui pòst tempore, diuinæ lucis radiis illustrati, pertæsi suæ rebellionis, Romam profecti sint, atq; abiurata omni contumacia, Romani Pontificis pedibus osculum fixerint; seq; eius potestati, authoritati permiserint, semperq; illius dicto audientes, fore venerabundi publicè & palam professi sint. Quos tu non modò, consilio, opera, sed & non exigua pecunia, equis, aliisq; rebus necessariis, iuuiisti, subleuasti; vt eò alacriùs & fidentiùs iter institutum ingrederentur. Sed cùm tu Luceoriam tuã, atq; adeò vniuersam Volhiniam Religionis potestate tenes: eodẽ interim tẽpore, Georgius Radiuilus, T. S. Sixti Cardinalis, Ecclesiam Cracouiensem summo cum imperio, maximaq; cura & solitudine gubernabat: qui dùm pro munere & honore

suæ amplissimæ dignitatis, & vt anni Iubilæi vberri-
 mos sacrarû Expiationû fructus cõsequeretur, Ro-
 mam iniquo anni tẽpore proficiscitur, eoq; affecta
 peruenisset valetudine, dura vi morbi depascẽte ar-
 tus, intimisq; medullis vitalẽ calorẽ hauriente, ibi-
 dem è viuis excedit, & quasi fatali falce, tergemi-
 na illa, Cardinalis, Episcopi, atq; Principis imperii
 dignitas atq; corona præciditur. Erant tum multi,
 (vt est Polonia fœcunda bonorum & magnorum vi-
 rorum) sapientia prouidentes, autoritate gra-
 ues, & pietate præstantes, maximoq; rerum vsu pol-
 lentes viri; qui hanc dignitatem tacitis animis, ar-
 dentissimisq; votis optabant, & sitienter cupiebãt;
 sed rogare, ambire, prenfare, nec eorum ferebat mo-
 destia, neq; Regis permittebat autoritas: tu tamẽ
 optimi & prudentissimi Regis, qui non magis e-
 xercendæ, quàm remunerandæ virtutis studio tene-
 tur, maturo & grauissimo iudicio, tot grauissimis
 viris antelatus es, ac Clementis octauï Summi Pon-
 tificis autoritate, ab Ecclesia Luceorienfi ad Cra-
 couiensem translatus es. Magnum excellentis vir-
 tutis argumentum est, & probatæ conscientiæ fru-
 ctus, cùm fasces pro fascibus committuntur, & qui
 magna consecutus est, maiora tamen mereri iudica-
 tur, idq; à maximis. At, qui dolor, qui gemitus fu-
 it Luceorienfiû, cùm ab iis discederes? nemo fuit,
 qui à

qui à lachrymis temperaret, qui singultus contineret, eiulatu lamentis atq; ploratu cōplebant omnia: Clerus patrem, nobilitas patronum, plebs altorem amisisse sibi visa est. Tibi verò vicissim etiam inuito per ora genasq; lachrymæ erumpebāt; nec animi dolorem celare, mista q; singultibus suspiria dissimulare poteras; & si integrum fuisset, apud eos fortè restitisses: toto itinere de iis loquebare, eorum memoria non modò animo, sed & oculis obuersabatur; nec ingens desiderium priùs aliquo modo leniri potuit, donec Cracouiēsiū effusa in te certatim studia cerneret. Summa enim animorum alacritate, splēdissimoq; comitatu & apparatu urbem inuectus es. Omnia tubis, tibiis, lituis, buccinis perstrepebant: Cytharis fidibus, sambucis, campanis personabāt; fragore & mugitu bambardarum & tormentorum contremiscebant omnia. Atria ædium, suauissimis odoribus fragrant: limina arborum comis, foliisq; virētibus frōdescebant: fenestræ pergulæ, mœniana, tapetibus Attalicis, & peristomatibus beluatis collucebant: tecta hominum multitudine referta, mole sua laborabant: omnes plateæ, vici, urbisq; regiones oppletæ, cōcurfabatur vndiq; alacris hinc inde populus, par vbiq; gaudium. Flos procerum, splendor equestris ordinis, longè extra urbem tibi obuiam prodiit: sacerdotum examina,

facro, plenoq; pietatis ornatu venerabilia, longo ordine te præcedebant: Doctores atq; Magistri, omnes togis atq; Epomidibus, tanquam veteres Quirites, ornati, cum innumerabili iuuentute sua te honorifica pompa in urbem deduxerunt; deniq; omnis generis, ætatis, conditionis ac fortunæ homines te faustis acclamationibus prosequabantur. Te paruuli noscere, te iuuenes ostentare, te senes admirari, & libera inter se voce loqui: Hicciné Bernardus Macieiuius, quæ oris dignitas, quæ corporis forma Priami imperio digna, quàm decora proceritas, quàm inflexa ætatis maturitas, vt ex oculis, vultu diuinus quidam vigor emicat, vt in gestu motu, decor atq; gratia, Summa ergò hominum lætitia, in folio D. Stanislai gloriosi Martyris collocatus, num in actu, vt antiquo verbo vtar, striaſti: num dignitate ad ocium, animiq; remissionem, num opibus ad perfruendas voluptates abusus es? Nequaquam, sed totus in laboribus, teipſo maior effectus, ac tecum certans, illuſtiora prudentiæ, pietatis, curæq; pastoralis documenta, atq; exempla edidiſti, & ea quæ ab ampliffimo Radiuilo Cardinale egregiè cæpta fuerant, ſupremam illis manum impoſuiſti. Nā primo quoq; tempore, Eccleſiaſticos omnes ordines, ex ampliffima tua Dioceſi, Cracouiã euocaſti; ac cum iis de rebus ad Religionem, & populi Chriſtiani

stiani vtilitatē pertinētib⁹, vtiliter cōsultasti. Deīde
magno sumtu tuo seminarium, ad eos qui sacris or-
dinibus initiandi sunt, pręparādos, ac sacrorum ri-
uum, aliisq; piis doctrinis pręcolendos excitasti.
Prytaneum quoq; sacerdotibus, qui aut ætate la-
boribusq; confecti, aut vi morbi pressi iacent, desi-
gnasti; vt & ipsi in ocio cum dignitate & rerum
necessariarum copia reliquum vitę transigant; &
alios spes futurę quietis, vitęq; honestę, subeun-
dis laboribus faciat promptiores. Moxq; Diœcesin
circumiuisti, lustrasti, in vitam & mores cleri in-
qui-
siuisti, libertatē Ecclesiasticam defendisti, ac bene-
ficioꝝ iura, redditus, muniaq; diligenter perspexisti.
Et cū de omnium Ecclesiarum commodis & orna-
mētis cogitares; tum pręcipuē principem tuam ba-
silicam, in qua tot Diuorū preciosi thesauri, totq; su-
perba Regum Mausolęa, vt sacrorum ritus maiori
honore peragerentur, ingenti vi pecunię donasti,
censibus ac redditibus annuis auxisti, grandibus cā-
delabris ex argēto conflatis, ingēti calice ex solido
auro elaborato, statua Diui Tutelarī Vēceslai ex ar-
gento fusa, eiusq; sacrosanctis relliquiis, ex vicina
Boemia & Silesia magno studio cōquisitis, tecto in-
super æreo, aliisq; illustribus & ad splendorē domus
Domini memorabilibus rebus illustrasti atq; exor-
nasti. Quod verò genus officii, erga Religiosas fami-
lias,

lias, Deo dicatas virgines prætermisisti? quod genus beneuolentiæ ministris Ecclesiæ nõ exhibuisti? Cui egeno opem non tulisti? quē afflictū nõ solatus es? cui pupillo, aduenæ, militi tua arca, tua domus clausa fuit? omniū dolori & calamitati illachrymabas: ab omnibus periculū, ignominiā propulsabas: vbiq; locorum odia, dissidia, simultates restinguebas, ac morte tua libēter aliis vitam repræsentasses. Quod cū religiosissimo tempore, lubilæi innumerabili hominū multitudine frequēti, tum sæuissima illa pestilentia, quæ vniuersam Cracouiam vasta strage depopulabatur, egregiis argumentis enituit. Nam sacerdotes, peregrinos, vndiq; ex vltimis etiam Lithuaniae & Podoliae finibus ad piacularem celebritatem concurrentes, totos tres menses largē & liberaliter, aluisti, sustentasti, & cū ex loco pestilenti præsentemq; omnibus mortem intentante, ægrē ac vix precibus victus discessisses, quos præsens charitatis officiis solari non poteras, absens incredibili liberalitate, atq; beneficentia subleuabas, multosq; non modò a dira lue, sed & ab intolerabili fame seruasti. Quid loquar de tuo erga artes eruditas, earumq; Doctores & alumnos, singulari amore, atq; beneuolentia? Testes sunt viri scientissimi, & nulla in re rudes, quibus latus tuum circumsepisti, cum quibus curas & negocia tua partiris. Testes tot ingenui

genui adolescentes, quos liberali impensa, tum hîc apud nos, tum apud externos, optimis disciplinis imbuendos curas: testes alii, quos præmiis allicis, honoribus inuitas, fortunis locupletas. Tua autoritate & opera effectum est, vt Serenissimus Princeps Vladislaus, germen Iagellonium, germen Austriacum, imago paterni animi, quiq; maturitate iudicii atq; virtutis ætatis cursum longè superat, inq; amplissimarum opum, ac tot Regnorum spem atq; successionem feliciter crescit, Lycei nostri, ab abauo & cognomine suo instituti, angustias subierit, humiles exedras inuiferit, ac literatas laureas, quas septē Philosophis tua vice distribuebam, conspectu suo augustissimo quasi splendidissimo quodam sole colorarit & illustrarit. Eaq; solennitate peracta, cum Serenissimo Principe, non modò procures Regni, floremq; comitatus Regii, sed & primores Academiae, splendido & dignitatis plenissimo cōuiuio accepisti. Tu nuper (ordinem temporum variabo) re diuina ad vnam & aram Beati Cantii peracta, quò maior esses, eò minor esse cupiēs, inopinatò in Collegium nostrum diuertisti, neq; mensæ nostræ tenuitatem fastidiens, frugale ac quotidianum nobiscum, tanquam vnus ex nobis, prandium sumere voluisti, ac deinceps in Bibliotheca nostra euoluenda magnā eius diei partem, iucundè transegisti, in qua & tuum

ex ære chorinthio Aristotelem, characteres Iaponicos, cum eiusdem ultimæ gentis Philosophia, & alia tuæ in nos liberalitatis monumenta, modestè ac verecundè recognouisti. Incredibilem eo die animi moderationē ostendisti, fascesq; & infulas literulis nostris submisisti; cuius insignis facti gloriam nulla obruet vetustas, nulla memori æuo eximet obliuio. Atq; hæc aliæq; maximæ virtutes, cùm tibi apud omnes ingentem gloriam peperissent, magnamq; tui admirationem commouissent, tùm supremi religionis nostræ Moderatoris propèsum animum ad tuam dignitatem amplificandam mirificè incitârانت, atq; inflammârانت. Iamq; olim te in arce honoris collocasset, nisi summa cunctatione in eiusmodi rebus, perpetuò vti, animum induxisset suum, cùm & Nepotes suos omnibus animi & naturæ opibus florentissimos, accepto pontificatu, toto ferè biennio pèdere animis, dubiaq; spe trahi passus sit, neq; priùs eos in purpuratorum Patrum numerum retulit, donec in amplissimo orbis theatro, in tanta rerum negociorũq; varietate & multitudine, ingenium, prudentiam, aliarumq; virtutum exempla ostenderent, atq; proferrent; ne tam cognationi quàm meritis summum honorem detulisse videretur. Cuius sanctissimi Pontificis acre in æstimandis cuiusq; meritis iudicium, feruens in remunerâdis virtutibus studium,

dium, sollicitos in Catholica Religione propaganda, hæreticisq; profligandis labores & conatus, auxiliarias deniq; copias, pecunias, aliaq; belli adiumēta, ad Turcarum violentiam refrænandam atq; excindendam, nulla ætas tacebit, nullæ non loquentur literæ. Hic ergò talis & tantus Pontifex, te nuper in arce montis Vaticani, ad gloriosum Clauigeri Petri tumulum, tuis meritis pensiculatè longoq; examine ponderatis, in Senatum Apostolicum, Princeps orbis terrarum, consilium adlegit, teq; Romanæ Ecclesiæ Cardinalem amplissimum renunciavit.


Plurimùm debet Sarmatia Clementi octauo, multa ab eo ornamēta, dignitatis, & præsidia stabilitatis accepit, quam gratiam nullis officiis, nullis memoris animi monumentis referre atq; persolvere poterit. Ille dum Cardinalis esset, ab vrbe in has Septētrionis oras arbiter & sequester pacis missus, trāquil-
litatem Poloniæ reddidit, ac vicinarum Regum arma atq; animos pacauit: ille Romanus Pontifex diuino consilio creatus, S. Hiacynthum, socium atq; discipulum S. Dominici, Diuorum cælestium ordinibus adscripsit: S. Stanislai gloriosi Martyris memoriam toto orbe, quā Sol oriens quā occidens, colli & celebrari iussit, ac B. Casimiri Regii sanguinis, sanctimoniam diuulgauit atq; publicauit: ille auspiciatissimas Sigismundi Regis, cum Serenissi-

ma Anna Austriaca nuptias, per amplissimum legatum Georgium Cardinalem Radiuilem cohonestauit atq; confirmauit, eundemq; Illustrissimum Cardinalem post grauius ægrotantem mori q; vicinum benignè inuisit, ac tum pietatis & beneuolentiæ plenissimis verbis, tum amplissimis veniæ atq; relaxationis thesauris ex infinito & immenso Ecclesiæ ærario depromtis, recreauit atq; solatus est: ille multos nostræ gentis homines ad honores extulit, opibus auxit, intraq; domestica limina, aut à cubiculo, aut à poculis, aut ab aliis officiis atq; ministeriis, amantissimè fouet atq; complectitur: illi Academiæ nostræ studia sunt cordi & curæ, eaq; per amplissimum Nuncium suum, Claudium Rangonum, Episcopum Regii, virum propter eximias suas virtutes, omni honorum fastigio maiorem, Serenissimo Regi nostro, prolixis & optimis verbis commendauit: ille deniq; quod caput rei est, te hoc ostro atq; coccino velaui, atq; exornauit. At quæ & quanta dignitas? quæ proxima Summæ potestati, Regum maiestati par, non nisi aut Principum atq; Dynastarum aureæ soboli, aut diuinis & admirandis ingeniiis, aut heroicis atq; præstantissimis virtutibus atq; meritis deferri solet. Vos Cardinales estis Principes mundi, Senatores terræ, Iudices orbis, signiferi populi, administri & adiutores Summi Pontificis:

Vos

Vos fidei præcipui defensores, Hæresum fortissimi extinctores, fidelissimi Sedis Apostolicæ vindices. In vestra tutela latet res humanæ, in vestro præsidio acquiescunt, vestro consilio reguntur, virtute muniuntur, autoritate conseruantur. Vos tranquillitatem publicam cōstituitis, pacem inter Reges stabilitis, fluctus atq; tempestates Rerum publicarum componitis. Vos estis seminariū Pontificum, vosq; ius & potestatem habetis, è vestro Ordine atq; Collegio, eum eligendi, cuius munus potestate Deo proximū est, dignitate inter homines summum, administratione, nullis regionum spatijs definitum, duramēto atq; stabilitate nullis seculis interiturum, nullisq; hostium machinis infringendum & expugnandum. Quare gaude Illustrissime Princeps, excellenti bono tuo, fruire hac sublimi felicitate: & quoties hic purpuræ fulgor oculos tuos perstrīxerit, toties ad maiora atq; illustriora suscipienda, arduam atq; excelsam vim mentis excita & intende. Nunc maiori cōstantia, atq; animi robore, Religio propaganda, libertas Ecclesiæ tuēda, & Hæresum monstra profliganda: nunc acriori studio atq; industria coercenda audacia, comprimenda iniquitas, frangendæ libidines, cupiditatesq; refranandæ: & qui antea de vnius Poloniæ salute atq; dignitate sollicitus eras, solūmq; ciues tuos pietatis artibus imbuebas,

nunc de vniuerso genere mortalium bene merendi
studium suscipiendum est, omniumq; vbiq; lo-
corum, incolumitati, trāquillitati religioni atq; pro-
bitati prospiciendum atq; consulendum est. Et
cū omnes plagas mundi mentis acie circumspe-
xeris, resq; humanas prouidentia atq; sedulitate ad-
ministraueris, huc quoq; ad nos oculos tuos huma-
nitatis plenissimos dirige atq; conuerte, hancq;
bonorum ingeniorum parentem, optimarum virtu-
tū nutricem, omnisq; doctrinæ liberalis Magistrā
amore complectere, liberalitate orna, patrocinio tu-
ere, eamq; in senatu, comitiis, synodis, Regi, pro-
ceribus, omnibusq; ordinibus etiam atq; etiam di-
ligentissimè commēdato. Quò pluribus profumus,
& commodamus; eò maiori omnium beneuolentia
digni sumus: quò minoribus stipendiis tot annos in
castris Musarum militauimus; eò vberiora nos ma-
nent præmia: quò minus ocii & industriæ ad aucu-
pandos hominum animos habemus; eò alacrius vos
magni Patroni vltro etiam neq; exorati nos ornan-
dos ac tuendos suscipere debetis. Nos verò infi-
gnem, & admirabilem hanc tuam in nos beneuolē-
tiam atq; liberalitatem, ad omnem posteritatis me-
moriā, ingeniis & literis nostris propagabimus,
atq; humi strati, altaribusq; aduoluti, omnes Di-
uos cælestes, publicis priuatisq; precationibus ora-
bimus,

bimus; vt Deus immortalis, qui tuæ dignitatis inceptor & perfector est, consilia tua dirigat, actiones fortunet, valetudinem confirmet, ac crudam viridemq; senectam impertiat, teq; sospitem ac vigentem, latum atq; felicem, cum sempiterna laude, immortalisq; nominis tui gloria, Ecclesiæ Dei, Reipublicæ Christianæ, literis, omnibusq; bonis, sed & Schoneo, quã diutissimè seruet, foueat
 atq; tueatur.

*Pagina 7. ver: 15. post verbum
 sciendi, addatur causa.*





1
3
2
7
3

